

幾
亭
外
書

幾亭外書卷五目錄

保生帖

小序

醫者脈論

送醫者病案

送鎮江張承溪病案

張承溪脈症論并方

自定方論

脾困喜春令

氣墜喜秋令

膽導之害

課兒程說

耐近壽

灸後耐閒

實理實事

變化氣質

艾功記

隨時休養

未勞先息

守中與多言對

覺衰防衰

無大病則壽

聖人寢食有道

聖人嗜味有道

心存故知味

損頤二卦

養生所主

六齋頌

抑腑順臟

化有常變

氣與味

水火淺中深

酒之味性

酒何故有毒

酒忌乳酪

晝飲夜飲

甘草之用

肉蓯蓉何故動大便

穀氣變化

藥食四異

藥以宿而純

菜心筍何故有毒

脈難定壽

丹溪論火之謬

吐衄血不同

瘧脈獨反

晝卧

側卧宜左宜右

升逆降陷各殊

避賊風

卷五

目錄

幾亭外書卷五目錄終

幾亭外書卷五

保生帖

平湖 屠象美

嘉善 周丕顯 全閱

小序

長子揆病奇而久，遠近醫者至，各有所長。余細簡方書，爲之叅訂，竟以得愈。因擇其立論之微，胗脈之精，方法之巧者，存之。又舉千日以來所帖養生防疾諸說、藥性食味諸條，悉彙而附之。

使多病之人時時省覽。可以少病。少病之人。觸目警心。亦有益也。鄉黨一篇。記聖人飲食起居。動中天則。而其中慎疾養身之理。具存。蓋雖清明強固。防于未然。無所不至。況于親嘗疾痛。親爲調治。費如許勞心焦思。而敢忘之乎。然因是又淡有感焉。歲乙卯。先人病背疽。時余未嘗淡繹方書。凡疽初起。只一艾火。可拔其根。而群醫莫知。竟不救。後其說旣宣。邑人凡病疽者。投以艾火。十愈八九焉。余用是恨恨無極。又七年。補

吾母病則以吾兄初亡年高過哀不能進食明
醫罔効其手非若先公之失治也起子病於今
而不能起父病於昔其忍恣哉其忍言哉人子
而不早究心醫肯能無沒世之憾也夫明道先
生云疾病卧牀委之庸醫比於不慈不孝

醫者脈論

戊辰

七月中醫者診揆兒脈曰大腸有火專緣陰血
不能滋潤以致便秘膈悶又大腸爲魄門魄門
祕結則上擾於魂夜卧不寧亦因於此余曰是

則然矣。今所慮者，肌肉日削，醫曰：無傷也。病進火炎而漸瘦，爲凶。病退火熄而瘦，自然之理。今當日長一日矣，且肉與血相依。夏月火令，雖性不畏暑，臟腑之情，豈能違天？病人陰血本虧，遇暑則血不能滋，血減則肉減。今清涼之運已到，血與肉俱當日滋，且中脘氣海二穴連灸，則一月以來，氣血僅足供其膿痂。今灸瘡平復，肉亦自長，又理所易見。總之脈雖病，決保無事，以其有神也。余曰：今脈雖有神，纏綿日久，安知不漸

至於無神乎、醫曰此爲病勢未定者、言今諸火俱熄、大腸一經偶有此火、數劑可除、病勢已退、固知脈中之神有增而無減、可以豫斷、余味其言頗有理、深幸其中、然是歲八月以後、神減病增、醫亦技窮、膽怯、要于脈理、非漫然無見者、故記之、

送醫者病案

戊辰

十月來、大便秘結、十日乃行、體常寒、顫、四肢不煖、鼻易塞、睡不寧、氣墜、胸膈飽悶、皆屬元氣虛

滯似近痞格。又唇燥上腭脫皮。有類火瘰。然總因上下阻隔不通所致。所以滋陰無效。清火愈非。須思一法。可以通徹上下。乃爲得竅。近十月來。膈悶益甚。食粥益少。日僅一甌。明晨尚噤。餘症悉如故。近冬至二三日。復增腎洩。所幸廿五冬至夜。腎氣安然。睡至二更方覺。覺片時復安睡。直至鷄鳴。此兩月以來。未見之妙。非因藥力而得。忽于陽生之候。有此消息。決非偶然。當是人身中生氣。能實與天時相應。化源猶在。調

養可施。常云補腎不如補脾。在今日脾困不受補。補脾又不如快脾。蓋疏其困頓。使之思食。則食補多于藥補矣。今當以進飲食爲第一義。或疎快之中。仍兼補健。何如。

送鎮江張承溪病案

己巳五月

丁未生人。稟薄而性躁。素有心腎不交之症。每勞過則發。丁卯冬遺精之症大作。兼以腎竅漏氣出如烟霧。時作時止。眠食漸減。形羸骨瘦。大便艱澀。其色頗黑。戊辰八月後。遂不下牀。今則

肌肉愈瘦、眠食愈減、午後必倦而寐、夜則惺然、然十夜中亦有三四夜瞑目更餘、但不能熟爾、目前最急者、惟進飲食爲第一義、而胸膈如有物踞之、腹則空虚、上則痞悶、每食少許輒停畱、不肯下、隔六七時猶嚔呼吸之氣、亦礙而不暢、以爲因虛致滯、則服人參必增懣、以爲稠痰蓄血、用疎快之劑、又全無功、大便比舊年稍順、色亦漸黃、然下雖通暢、上常否塞、上下不復相應、殊不可解也、又畏寒特甚、卽今仲夏猶掩重幃、

大約此病本起于心腎不交。今漸變成脾症。所望治者有四端。一曰聲音雖輕而不變。二曰身不熱。三曰口不渴。四曰面色白而不赤不黑。每見病卧經歲者。高年十救一二。少年十起六七。無他。其真種子畢竟當方長之候。消磨不盡。尚多挽回。半年以來。每日僅用粥餌二盞。或終日不食。旁人疑在旦暮。然綿延至今。或者元氣猶存。俟隔垣上池之流起之也。起之之道。必在舒其胸膈之鬱滯。而舒鬱悶路從何而入。須扁佗

之手。剖人鬼之關。又病者自云。我憶仲春來。大腸氣數不禁。遂覺胸膈痞悶。繼因過防。衄症日飲。童便不休。大便稍稍漸順。此非真順。乃氣虛而下脫也。近來但大便後。卽覺腹中虛怯。而胸膈分毫不寬。若大便所下甚多。則胸膈痞悶愈甚。今悟治之之法。不在疎其上。部專須補其下焦。下焦漸實。則上部必漸鬆。他醫又一說云。因病者素畏鼻衄。最甚。飲清滋之藥太多。況卧牀半年。全不運動。胸中痞塞。未必非藥鬱也。

張承溪脈症論并方

張以五月初八至卽夕及明晨連診脈二次論曰男子久病以太谿太衝二脈決其死生上部有脈下部無脈其人當吐不吐者死上部無脈下部有脈如樹之有根枝葉雖彫定知無害今兩手脈原無險而太谿太衝有根必不死之脈也其症名爲下脫凡陽氣上絕陰氣不得上交于陽則爲下脫龜頭出氣是也陰氣下絕陽氣不得下交于陰則爲上脫耳中出氣是也余爲

之解頤曰。此病年餘來。醫者尚未能定其名。今名既定。可以議治。竊思失血之症。如吐衄之類。皆爲錯經妄行。而不知氣症。亦有錯經妄行者。因過瀉成虛。腎氣不能自主。錯經而妄漏。經云。醉飽入房。五臟反覆。五臟部位。寧有反覆之理。正謂其氣錯亂也。今未能提其氣。復使歸經。所以時發不止。時漏則氣易虛。氣虛于下。則易結于上。故飲食難化。而成鬱結痞悶之症。今用藥宜疏通鬱滯。不可誤用滋陰。宜有提有降。合成。

疏通不可專用順氣。張君大然之曰：醫者認此爲陰虧之症，遂謂虛勞不受補者不治大誤也。陰虛生內熱，豈有陰分大虛卧牀一年有半而不發骨蒸潮熱者乎？滋陰之藥不惟無功，且于開胸膈進飲食甚爲相礙。今但使膈間日寬一日，穀氣日增一日，則陰不補而自補矣。起色可指日而待。

煎方

橘紅半夏麴

各錢半

茯苓

一錢

蘇子

二錢

生升麻

八分

生柴胡

四分

山查

二錢

五穀虫

一錢

烏藥

一錢

香附

一錢

臨服入韭汁二匙

右方疏鬱爲主而升降互用其旨頗精服一二
十劑雖不大效然視向來之服一藥增一病則
霄壤矣

自定方論

余見服前藥未效復悟此病宜靜以守之俟元
氣之自復不宜多用湯藥浸灌且張公臨行囑

云我別後寧勿服藥。不可妄投。若再滋陰。必致變症。勿藥而待。不過起日稍遲。究當平善也。乃令停藥。弗服久之。復因其陳鬱大旨。為之推廣。通變自定。噙化丸。

噙化丸方

人參

六錢

真西黃

一錢

乾蟾

炙存性
一錢

白礪砂

一錢

貝母

三錢

橘紅

四錢

醋香附

四錢

桔梗

三錢

松蘿茶

二錢

薄荷葉

三分

煮烏梅肉

二錢

梨膏加竹瀝膏爲丸每丸一錢

論曰胸中結塊原起于午食後卽卧用噲化丸使睡中常有藥氣疏通肺胃之間彼將欲結藥往疏之新結不增舊結漸解卧時成病亦治以卧時且病在膈上不用湯之蕩滌丸之沉下而用噲化徐徐沁入日計不足月計有餘也服六七十丸後膈間漸寬

脾困喜春令

巳巳冬

揆病卧踰三冬矣時醫皆云防春來脾病轉劇

余曰無憂。凡脾受肝剋。則春至畏木氣益侵。今乃脾困。非脾弱也。冬氣閉塞。脾困所畏。幸喜及春。方藉木氣以疏通之。已而食果稍增。肌亦漸澤。五臟之情變化如此。第執生剋之常。幾何而不悞人。

氣墜喜秋令

醫家疑氣墜之症。至秋未必愈。以秋金主降也。不知肺主氣。氣得其令。則降者自降。升者自升。各得本職。非謂有降而無升也。能使清升濁降。

則氣墜之病正宜愈於秋淡。

膽導之害

揆初病卽患大便燥結。醫家令用猪膽入大黃。皂角末爲導。初用甚快利。并上部諸火亦覺清。息至戊辰季春將百日矣。無復效。以腸氣與藥氣相習也。至六月初則愈導愈祕。卽大便偶行亦努力倍常。如此者又半月。予忽于二十日平旦思猪膽至苦寒之物。苦旣屬燥。寒亦屬燥。而大黃之迅悍最傷胃氣。自上而下能傷胃。自下

而○上○獨○不○能○傷○腸○氣○乎○飲○與○導○非○絕○相○遠○人○不
敢○暫○服○大○黃○而○今○久○用○爲○導○輔○以○膽○汁○皂○角○剝
削○正○氣○攪○刮○脂○膏○求○潤○而○彌○燥○求○通○而○彌○窒○求
清○火○而○火○以○祕○結○彌○熾○及○今○不○止○害○將○無○窮○蓋
五○臟○六○腑○各○有○脂○液○大○便○調○暢○全○賴○大○腸○之○滋
潤○能○自○傳○送○未○有○消○其○自○有○之○脂○能○借○藥○以○成
潤○者○也○乃○定○一○法○仍○用○猪○膽○將○原○汁○去○盡○入○蜜
同○溫○水○滿○之○不○加○他○藥○單○用○爲○導○每○三○日○一○用
用○則○大○便○必○來○月○餘○後○不○須○努○力○矣○又○數○月○遂

不必用導蓋蜜性溫味甘能補能潤又溫則能
解除大熱正與膽汁大黃之苦寒燥相反而效
亦絕殊所以不用蜜煎者蜜煎須腸中有實火
方能消解而出今病久腸氣虛須蜜水爲便而
蜜水非借膽導之法勢無由入肛門借其邪廓
易其中藏亦一時之權巧也恐後人不識膽導
之害特著之

課兒程說

乙丑送某師

揆幼患鼻衄歷數病因無不發于進銳辛酉春

師急於見功、隨致大病、危然後安、延至冬暮、空費三時矣、壬戌且思補昨歲之荒缺、未幾又發荏苒一載、因躁得遲、癸亥始取春間及初夏工夫減半、遂覺悠閒爽健、長年用功、頗有進益之趣、無如師駕之數旋何也、師來既稀、不得復顧弟子之疲、而必欲明其教力、至甲子、痼疾又大發、經秋未復、歷歷計之、使督課有方、每年稍寬於三春初夏、必不致三載全曠矣、假令春來徑不讀書、而三時得以綿密、于筭猶長、況僅取減

半耶。躁則反荒。恬則耐久。惜弟子之力。所以成師長之功。騏驥汗流遷延。失其調也。飽食徐行。凡馬歷旬。而齊秦之郊決矣。御之善。凡驚可以致遠。不善。上駟或屈焉。夫善御。豈獨以法哉。有愛其馬。而惟恐傷之心。王良造父。恐傷馬者也。帝臣王佐。恐傷民者也。明師之善育人才。恐傷其子弟者也。若忽而漫焉操切。忽而頗焉廢閣。心之忍矣。功亦何存。揆也。自今以往。真覺分陰難錯。而惜陰之機。全須寬緩。但使每年重五以

前、悠、衍、自、得、既、度、此、關、便、可、照、式、用、功、學、業、可、
成、病、根、亦、可、拔、前、師、于、二、年、之、後、方、鑒、前、車、而、
旋、忽、忘、之、叮、嚀、不、早、敷、陳、不、明、亦、主、人、之、罪、也、
幸、新、師、于、初、至、之、時、早、防、覆、轍、是、真、師、保、卽、賢、
父、兄、

耐近壽

揆、年、十、六、七、謂、之、曰、情、性、須、耐、煩、不、可、輒、生、暴、
躁、容、止、須、耐、看、不、可、驚、閃、變、更、榮、辱、毀、譽、須、耐、
受、不、可、傍、惶、動、心、居、處、交、遊、事、物、須、耐、久、不、可、

喜新厭故。種種善耐。則天與歲月亦耐。承當仁者壽。惟仁者耐處。約樂故爾。

灸後耐閒

灸不畏痛。爲思後益長耳。及痛甫定。乃不息心耐閒。沾沾然脩理素業。致損艾功。是以耐痛求益。以不耐閒棄益也。痛難耐而能之。閒易耐而不能。徃夏吾犯之矣。今一月內。揆須以耐痛之志耐閒處。灸之病旣除。所灸之病必愈。

實理實事

養身不過二端。仁愛其實理。保攝其實事。仁愛先親親。保攝先節慾。

變化氣質

世間少不治之症。多不治之性情。人生無可恃之命。有可恃之調理。

艾功記

數十年痼疾。藥餌不能攻。其在經絡肌骨者。宜用針。其在臟腑腸胃者。宜用灸。灸之利害。余備嘗之。余二十時得痰厥頭痛。每發輒嘔痰涎酸。

水嘔必數次、痛苦異甚、少年時發、尚希少、既發而止、旋即能食、迨三十四五來、發日益頻、止後如久病者、粥餌調扶一二日、乃復此、胃氣漸衰、病根漸深、之驗也、決意灸中脘十一壯、更欲灸豐隆二穴、而庸醫不識、妄謂膏肓勝於豐隆、遂亦灸五壯、七日後吐紫血、逾二三日尋止、又七日痰中復帶血、凡十餘日、氣體狼狽、自顧甚危、竊疑誤灸所致、復有庸醫者曰、素蓄此疾、在將發未發間、適與灸會也、余不之信、簡方書云、凡

脈浮而數者不可灸，灸必吐血，乃愕然，益信灸非其穴，且非其時，遂致此害。月餘血病良已，復旬餘，形氣漸復，自灸至此，凡兩月矣。俄腹痛如下痢狀，醫者曰：痢也。余又疑非痢，觀所下皆稠痰夾紅紫塊，三日而止。復簡方書云：凡胃有老痰，攻去如下痢狀，私自喜病根之或拔也。自是調攝半年，毋論嗜慾，不萌一切飲食，風霜用心勞形之事，無不節省。馴是二十年，痰厥漸絕。客曰：從子言是艾始罪而後功也，獨以功稱何哉？

余曰。灸非其穴。灸非其時。非艾罪也。中脘一穴。得竅。而其功如此。使當時易膏肓而豐隆。以中脘數壯。動其老痰。以豐隆數壯。引其痰飲。與上升之火。走歸下部。其功之捷。且大。更不知若何。是艾有功而無罪也。余見痼疾之人。疾發則苦。暫已則安。勸令忍片時之痛。則頓蹙而辭。既有所畏。亦未信其功也。不知一刻之痛。與終身之苦孰長。況有因而暗損天年者。但將灸之先。當保養月餘。使知脈者。詳察不浮不數。使專門鍼

災者審定應灸某穴。量點精微。不爽秋毫。則無害而有利。必矣。慮子孫異時有患痼疾而苟安者。記以示之。天啓四年七月三日記。

隨時休養

養生之法。莫如隨時。人皆曰。吾迫於有生之勞。安得閒暇少時。以休吾形。澄吾神乎。歲安有無事之月。月安有無事之日。此終身不得者也。一日六時。每言動思慮之暇。稍瞑目靜坐。遇事卽起。日一次可也。二三次可也。合之約得半時。是

亦十分之一。合十日論之。則一日全閒。以一月計。是三日全養也。不愈于息息奔趨營擾而空嘆未遑者乎。常不使極。則形神耐用。流水悠悠。戶樞時運。若使流水旋激之。則濁。使童子晝夜撼戶而搖之。不半歲。樞可敝也。過動之害。等于過靜。豈獨枯寂能朽人哉。人勞隨時養之。人過隨時改之。人業隨時脩之。微積焉。則壅。其後愈難爲矣。隨時之義大矣哉。

未勞先息

未勞而息。則氣常生。覺勞而後息。晚矣。況覺而未肯息乎。非孔子之發憤。非周公之思兼。高者爲見聞之學。卑者爲嗜慾耳。皆不知所以養身者也。戒之。戒之。

守中與多言對

留氣則留生。故言不如默。言不可已。故多不如少。疾不如徐。高不如輕。少言徐言。輕言皆不使過。而窮其氣。所謂中也。守之亦以養德。

覺衰防衰

嘗以四箴名齋曰淡嗜調元擇勞平愾蓋嗜慾
濃伐性第一飲食不節化元受傷勞於無益
何如養安暴怒撓寧神魂併敝道所不安養所
不存凡人三十以後年衰一年合十年觀之便
見既十年一衰則年年暗衰可知既年衰一年
則是日衰一日但總觀則覺而析觀則忘非惟
觀者忘之已亦不自覺也不覺者昏覺而不防
者忽防之之道敬守四箴以德養壽其衰也稍
晚以壽進德其存也不虛

無大病則壽

多病多壽謹故也是矣而未盡蓋惟謹則無大病。凡人之夭皆非氣血盡也。殉欲忘生于是有大病以壅遏之。有一臟偏枯以遞竭之。不然但除殤子之外。雖賦薄者亦必有七八十年。其氣乃竭。其血液乃稿。至于溫公不知疾革。孔明嘔血酸辛。則天遣之不得爲閒人。故不以食色耗以政事耗。若不當此位者。則有何不得已而自伐其生。

聖人寢食有道

食不語寢。不言禮也。亦養生之法也。喉在前爲堅空。主呼吸。咽在後爲柔空。主吞嚥。毫不相犯。凡食必歷氣口而下。嚥食則氣口垂閉。語則氣口開張。方食而語。則食乘氣入喉。戕刺而咳。卽良朋相晤。學分相商。必于飭未入口之前。食旣下咽之後。方可應對。古人必完當一日之事。然後寢息。凡有所欲言。俱在臨卧時。旣已登牀。一味安靜。肺如懸鍾。行坐跪立。發聲皆順。惟眠則

肺葉相貼、其中不虛發聲、爲逆、故凡含哺而對、
息牀而呼、自非體度亦復害生、大抵禮之防閑、
都是因人之便、循理無不合于養生、識得此意、
謹慎皆適、縱恣皆乖、不識此者、反以縱恣爲娛、
謹慎爲苦、知謹慎之爲適者、自無徃而非謹慎、
矣、謹慎出于能知、則致知之功、何處可以不到、
只觀聖人一寢一食、便合天地之氣機、在聖人、
動而中禮、在吾人、動而思禮、

聖人嗜味有道

病後或喜魚鮮或喜諸菓而獨不安穀則精神
不增手足無力安穀矣未能食諸物自覺形神
充鬯稼穡乃脾之本味而脾者肌肉四肢之主
也故曰安穀者昌健時恣意肉味菓菜奪穀氣
使不得爲主所損豈其微哉肉雖多不使勝食
氣至哉攝生減疾之方乎不輟薑食則聖人臟
腑偶自相宜非有理在其中謂人宜法也且他
聖亦未必爾惟酒無量酒亦孔子所好但食薑
必不過多飲酒必不及亂蓋與不使勝食氣同

理。凡。人。嗜。味。不。同。皆。根。臟。腑。聖。人。德。性。中。和。臟。腑。未。必。無。偏。勝。則。食。味。未。必。無。專。嗜。不。多。不。亂。嗜。好。亦。德。性。偏。勝。亦。中。和。是。則。一。飲。一。食。莫。不。可。法。于。後。世。若。以。薑。酒。爲。物。特。妙。天。下。之。不。能。飲。酒。不。能。食。薑。者。多。矣。又。可。使。之。學。耶。不。足。爲。人。人。法。筆。之。何。爲。故。知。爲。不。多。不。亂。記。非。爲。薑。酒。記。也。善。觀。聖。隨。處。可。以。見。聖。

心存故知味

聖。人。發。憤。忘。食。及。下。筯。時。又。不。草。草。觀。食。不。厭。

精一章何等仔細。此無他。聖心不滯一處。故無所徃而不存。王安石專精讀書。每食不辨美惡。但近身者必盡。當其好學時。已先犯心不在焉。食而不知其味。一大病矣。世人無所用心。品題酒饌。此直飲食之人。又得罪于安石。善學道養身者。只是于味無求。臨食不苟。

損頤二卦

化元無常。先後天無定。孤藏以漑四旁。則脾者。周身之化元也。氣生質。陽生陰。則丹田者。精液

肌體之化元也。滋味爲後天。則嬰孩之乳哺爲先天。推之。則母懷又爲先天。推之。則孕時父母之無疾。又爲先天。推之。則父母自身之稟氣。又爲先天。凡先天皆命也。惟平生之調攝。屬性故康寧。疾病命也有性焉。君子不謂命也。腑表而臟裏。腑病或不及臟。臟病無不及腑。腑易治而臟難療也。傷臟多起於七情。傷腑多因於飲食。聖人于損致戒曰。慾忿窒慾。于頤致戒曰。慎言語。節飲食。夫慾忿則木和。窒慾則水滋。慎言則

金息節食則土不勞。四者全。神明亦無不調矣。
養德之道。養生具在其中。離德而談養生。生何
繇養。

養生所主

養生以飲食爲主。飲食以水穀爲主。水以潔爲
主。穀以精爲主。其他酒穀以淡薄爲主。愈醲郁
愈肥甘。損多益少。期望舉家宜食齋素。使腸胃
中隔半月。則清虛一番。每日晨起食素粥。午膳
用葷。夜則清酒數酌。食品不拘。但取沖淡去肥。

醲半醉。半飽。夏月晝長。隨意加點心。少許。或素
粥。或藥糕。如此長守。可以少病。若恃服食藥餌。
雖至平和之味。久服必偏。曾粘一聯於內室云。
長淡其奉。以厚吾生。病軀宜守此。又爲養病吟。
曰。潔於水。精於穀。淡於酒。薄於肉。可清氣。可釋
慾。可寧神。可養福。逸其心。閒其目。省其口。時其
足。撫鳴松。對脩竹。舒布幃。棲木屋。微納涼。多乘
燠。衆易供。安吾獨。嘻。富貴真浮雲。眠中悟。無欲。
曠然長無事。此生良自足。健來春煖。或清秋。且

悅名山看樵牧

六齋頌

嘗觀養生書。無以厚味求補者。惟素問有云。陰不足者。補之以味。蓋穀菓皆有本味。隨其所主。各補五臟之陰。非指肥醲也。肥醲生痰助火。煎耗真陰。顧安能補之。惟藜藿之腸。衰年枯槁。乃有非肉不飽之說。亦指農夫若夫膏粱士人。正當反是。朔望齋素。清虛猶少。五日一素。覺得其宜。祭祀宴會。勞賞僕從。則不以例也。復立六齋。

頌頌曰午輩晚素甘節已習。潘餘交錯。司饋難
葺一候而齋。惟五惟十月晦。或小領以朔日賓
至。毋拘作賓亦易。過醲滋痰。間淡卽石寬。老者
胃散。幼者積。每月六之用和六脈。敢僥天嘏。我
適各適。

抑腑順臟

脾胃一表一裏一陰一陽。其喜忌相反而相成。
胃喜寒。脾喜熱。胃喜潤。脾喜燥。胃喜肥濃。脾喜
沖素。正如可否相濟。以成其和。在智者善調之。

若喜忌悉同。反成專勝。無調配得和之理矣。大抵寧抑腑以順臟。不可強臟以從腑。如冬飲水必病。夏飲湯益宜。恣酌湯水。則聚飲忍而不飲。則益強飯肥濃。致疾萬狀。沖素止於不益肌肉。槩可見矣。又五味隨時。孫思邈有逐月增減法。其原出于月令。養親養身。亦不可不畱心。但人性常嗜。或又不同。則就月令所宜。畧爲伸縮。

化有常變

覺則脾能磨食。寢則易停。化之常也。勞極傷脾。

之後飯餘微寢食反易餓化之變也然須少食

氣與味

滋益之味。骨血爲重。疏利之氣。草木爲先。

水火淺中深

食其氣者。水火宜淺。食其味者。水火宜中。食其質者。水火宜深。

酒之味性

酒入肝。總其性也。本草云。酒之辛者善散。苦者善降。甘者居中。淡者滲利。分其味也。肝爲厥陰。

風木厥逆也。言其性善逆風之爲性上浮。木之爲性上出。而酒性善升。與之同類。故云入肝。如苦酒其味自降。其性自升。升降並行。總之入肝也。

酒何故有毒

醫家問云。本草言酒大熱有毒。又言真正酒少飲益人。何也。曰。酒之爲損。有本質焉。有造作焉。兼惡則損。盡美則益。美惡半。則損益參。五穀之中。惟糯米性滯。發風擁經絡。氣迷悶人。則是未

經醞釀以前爲害已深矣。加以麴麴鬱遏所造酒，又鬱遏所成。凡物經鬱則熱，而有毒酒出于重鬱之下，不熱亦熱，無毒亦毒矣。況糯米本性不善乎？世傳南茶北酒，又稱滄薊之酒妙天下。初不解其理。丁卯歲，曾居滄州數月，時有鬱熱之疾，但少飲數卮，便覺爽然，雖微醉少卧，卽醒。始悟北酒之善，因用黃小米造成，所謂黃梁也。其性乃去風除濕，與糯米絕殊，所以氣味冲爽。則酒當先論質地，始論造法。滄俗造酒用薊

花少許。菊性涼而祛風，甚佳。惟冬月喜飲生酒，初夏乃蒸熟，故滄酒陳者勝。若製麴時，先和菴豆合成，及成酒後，澄清旬日，卽隔湯蒸熟，踰年然後飲之。菴豆涼而疎利，最能解散鬱遏之氣，隔湯蒸之，既不經火，而脾性喜熟，不喜生。又經年後，鬱氣漸散，熱者可不熱，毒者可不毒，獨資其養脾行經，禦風陶情之用，庶幾益人。然妙總在少飲二字。若沉酣及亂，鮮不傷矣。醫者曰：吾見四方名酒，或如珍藥，或恃名泉，香色味非不

佳然皆用糯米釀造推以此理終屬損多江南
既無黃梁惟宜粳米惜酒工罕知其法南麵作
麵濕熱尤甚須用北麵或用北麥磨麵造之何
如曰可哉然美祿難消勿令謂飲食之人賤

酒忌乳酪

本草乳酪下數條竝云酒同化服而酒條下乃
云凡酒同乳飲病氣結若相矛盾蓋服乳之時
以乳爲主量入酒漿則借善行之勢乳不凝滯
飲酒之時以酒爲主雜乳飲之酒既濕熱乳性

復膩未得其滋陰之力而胃先不爽矣。乃知時俗之飲乳者誠未得其方也。本草不著之乳酪之下而著于酒條無非見乳之益多酒之害大。

晝飲夜飲

丹溪言夜飲傷人以氣宜斂而反發之。猶暮不食薑之意。然惟貴少飲不在拘時。邵康節午後三盃極自得趣。然在吾輩或偕良友或乘芳辰偶爲之可耳。若晝飲習以爲常雖止數盃覺有昏氣于讀書靜坐殊覺未便。薄暮清酌微醺燈

至而止。比就枕時。酒氣已散。覺有助於寢息。而不妨于用功。較晝飲爲得也。人各適性。不必師康節。不必泥丹溪。亦不必拘我。

甘草之用

甘草調和諸藥。爲諸藥原。有不調處。若所用各味。本皆純和。何所用調。譬諸良友相聚。呼一坊長。立于其前。爲之勸解。所勸何人。所解何事。適妨諸公之歡笑耳。然辛甘發散。爲陽。甘草補中發散。固自有用。近時醫者。凡藥皆用以調和。是

忘其本力而謬取其借資。盍審之。

肉蓯蓉何故動大便

本草言肉蓯蓉驟用之反動大便。繆仲淳屢用奇效。然觀其疏解尚昧所以。蓋此藥鹹溫潤下。本走腎經。但以膀胱竅窄。大腸竅寬。峻用則其潤降之力。膀胱不遑領受。而大腸能受之。故藥力不走膀胱。反走大腸。原非動大便之藥也。凡血液枯槁。用此爲宜。倘有腎滑症者。用之則藥本歸腎。腎又熟路。善通徑。增滑洩之病。而大便

祕結如故矣。不可不察。

穀氣變化

問。孩童癖積。惟五谷。虫消之。此是何理。曰。鳥獸之糞。不生此虫。蓋五穀腐後所化。取腐後化生之氣。潔之以水。焦之以火。消臟腑之所不能消。穀者脾之五味。其本性能養脾。其變化後又能助脾消積。

藥食四異

藥食之性。大似人才。有本來純粹可用者。米粟

薯蕷人參地黃之屬是已。有不可直用。須駕馭而使者。半夏大黃之屬是已。有因人工而變其性。柿薰則溫。萊菔煮則滯。是已。有終不可用。砒石鳩羽是已。必利必害。非至愚不昏用之之妙。要當在駕御變化兩者間爾。讀脩製法。可以和日用飲食焉。可以調子弟僮僕焉。

藥以宿而純

藥有久而後精者。橘皮取陳。艾求三年。或言不久則其致用不全也。是不然。物之氣味全不全。

在生時採取之後。寧復滋長。止因此類稟性已烈。乘新而用功。中有病宿久。則其烈性漸馴。而功用精純。特以久去其甚。非以久滋其力也。人負奇才。或老之而乃大。馬援晚成。亦猶此意。第老當益壯。存志微差。遂不令終。尉遲膺文皇之嚴諭。老遂謙退。此又人善處老。與不善處老之分。可因藥而內自省也。

菜心筍何故有毒

白菜疎利。而菜心有毒。竹葉竹茹竹瀝。皆解熱。

消痰而笋有毒。何其反也。物有未伸之氣。先時而折之。雖蒙水火之變。借人氣息。猶能發洩。故患瘡腫之人。食之則增痛增癢。若人身平和。臟腑之氣。足以運化物氣。不至爲害。本草云。凡瓜果未熟者。有毒。皆此意。非其性真毒也。鬱也。譬如和厚之人。逆阻其方來。亦懷不樂。然此皆天鬱也。酒之有毒。則人力造作之鬱也。天人之爲鬱異。而鬱之爲毒同。又俗稱羊肉有毒。羊肉大補。功同參芪。毒性何在。然瘡腫增痛如神。蓋大

溫大補之故。非關毒也。譬如癰疽。早用白朮。則腫潰益甚。痛楚益加。膿窠瘡亦爾。白朮豈有毒耶。

脈難定壽

華佗擬病人於十年之後。以爲病去亦十年死。病存亦十年死。病不能爲身死。生因勸其人勿治。此以脈論耶。以脈中之數論耶。佗固神術。度此病人。必能謹疾。以應脈也。大抵脈可決壽。專爲能盡所受氣者而言。若溺色貪味。過勞多怒。

百事不謹之人。或得猝疾。或傷意外。豈于脈中。豫見。庸醫操太數脈之說。眩人。誤而信之。反弛。慎疾之意。智者一笑而揮之。

丹溪論火之謬

丹溪云。氣有餘。卽是火。此語誤人。氣安有有餘之理。據云有餘。是凡火症。宜用剋氣瀉氣藥也。若對血言氣。則是血之不足。豈氣之有餘。故曰。滋其陰。則火自息。第令益彼。不令損此。意至明矣。凡火有二。在臟腑者。升降自如。則爲氣衝逆。

上攻則爲火在經絡。筋肉間者流行不滯。則爲氣壅於一處。則爲火輕。則爲痛。爲癢。重則癰腫生焉。兩言以蔽之。氣逆爲火。氣壅爲火。斷不可以有餘爲火也。逆則宜順。壅則宜通。

吐衄血不同

丹溪極言嗜酒致病。其中有曰。淺者衄血。深者吐血。則此二症。淺深迥然。書言鼻衄與吐血同治。謂病門同。則治法大意同。非謂病之淺深同也。

瘧脈獨反

已未秋、余病瘧、五六日後、醫者診云、今日止矣、
高果哉、至、診之曰、今日恐更甚、午後果然、至明
旦、他醫復診云、今日脈勢不減、高復診之云、今
日當止、果遂止、余問其故、初不肯言、強扣之、乃
曰、瘧之爲病、與諸病不同、譬猶鳥之有鷹隼、獸
之有虎豹也、其脈法亦與他病脈異、猛獸將搏
也、必伏、鷙鳥將擊也、必縮、瘧將發也、脈必隱伏
而和平、非真和平也、將熾而反伏也、故知益甚、

若夫未作之先。脈勢搏擊。此則邪氣已衰。將欲消散。故先現於清晨。以是知本日不作。卽作亦輕矣。高樸實士。非得的傳。安有此超悟。

晝卧

夜卧能使氣降。晝卧能使氣升。人至暮勞極。眼白昏而帶赤。靜卧一宵。詰朝對鏡。清徹如故。此氣降之驗也。晝倦當靜坐片時。或散步玩物。睡態自解。若因而沉寢。則初覺之時。目白必赤。此因卧而氣反升之驗也。蓋晝當與陽俱開。乃逆。

其候而閉之。譬如夜當與陰俱閉。乃故狂呼豪
飲。皆傷壽源。古人云。夙興夜寐。出作入息。天之
令也。人之紀也。愚一生勸人夙興。不勸人夜坐。
側卧宜左。宜右。
飲後卧宜側左。食後卧宜側右。大腸膀胱各從
其便。

升逆降陷各殊

升與逆不同。肝腎居下宜升。心肺居上宜降。水
火交則無疾也。肝爲風木。木生必升。風起必升。

豈得爲病。其太過則口苦頭眩。是逆也。腎氣逆則口作鹹。亦逆也。非水升之謂也。故居下者宜升。不宜逆。居上者宜降。不宜陷。

避賊風

孔隙風名爲賊風。何也。曰。平面風如開口之呵。簷下風如撮口之吹。呵溫而吹冷。吹已不可不避。況孔隙乎。鐵之爲物。方圓平厚。可坐可凭。惟刀錐不可近。薄與尖故也。縫風如刀。隙風如錐。

幾亭外書卷五

終